

## Aralin 5

### ANG ESPIRITU SANTO AY NAGBIBIGAY SA IYO NG KAPANGYARIHAN

#### Sa Araling Ito'y Pag-aaralan Mo

- ✂ Kapangyarihan Para Sa Maraming Layunin
- ✂ Ang Pangakong Kapangyarihan
- ✂ Ang Pangakong Natupad Nang Pentecotes
- ✂ Ang Karaniwang Karanasan Matapos Mahikayat
- ✂ Mga Tanda Ng Kapangyarihan Ng Espiritu

#### KAPANGYARIHAN PARA SA MARAMING LAYUNIN

##### Dapat Mong Matutuhang Gamitin Ang Kapangyarihan

Isipin mo kung paano naga-gamit ang koryente: Ilaw, para sa mga lunsod; panluto, pampainit sa mga tahanan; nagpapakilos sa mga pabrika, at sa lahat ng uri ng makinarya. Ngayon, nagagawa na ng tao ang mga bagay na mahirap mangyari noong araw, sapagka't natutuhan na nilang gamitin ang lakas ng koryente—pati na ang pagtungo sa buwan.



Ang Espiritu Santo ay nagnanais na ikaw ay mapuspos ng kapangyarihan, lalong higit kaysa lakas ng koryente—upang magawa mo yaong mahirap mangyari kung wala ito. Subali't kailangang matutuhan mong gamitin ang kapangyarihan. Ang kapangyarihang ito ng Espiritu Santo, kung gagamitin sa wastong paraan, ay maghahatid ng kapurihan sa Dios at pagpapala sa iyong buhay. Ang anumang uri ng lakas o kapangyarihan kapag ginamit sa maling paraan ay laging maghahatid ng kaguluhan.

##### Tatlong Pagkakamaling Dapat Iwasan:

**1** *May mga taong ginagamit na parang laruan ang*

### *kapangyarihan ng Espiritu:*

Ito ang suliranin sa iglesya sa Corinto. Lubha nilang ikinasisiya ang pagsasalita ng mga wika anupa't sa kanilang mga gawain sa loob ng iglesya para lamang silang naglilibang. Napakagulo nila. Inakala tuloy ng mga nagmamasid na sila'y nasisiraan ng bait. Ipinagunita ni Pablo na dapat gawin ang lahat ng bagay na may kaayusan. Dapat nilang matutuhang gamitin ang kapangyarihan ng Espiritu Santo upang marami ang maligtas at huwag lumayo kay Cristo.

## **2** *May mga taong umaangkin sa karangalang nararapat maukol sa Dios:*

Kung binibigyan ng Espiritu Santo ang isang tao ng sapat na pananampalataya upang makapagpagaling, ito'y hindi upang makasigaw siya ng: "Tingnan ninyo ako, kayong lahat! Nakapaghihimala ako! Makapangyarihan ako!" O kaya, kung may ginagamit ang Dios na taong nakapanghuhula, ito'y hindi upang masabi niya: "Makinig kayong lahat sa akin, sapagka't ako'y propeta! Lumapit kayo sa akin kung ibig ninyong malaman ang dapat ninyong gawin." Ang ganyang kapalaluan ay nagbubunga ng maraming suliranin.

## **3** *May mga taong hindi naman ginagamit ang kapangyarihan ng Espiritu Santo:*

Ito ang pangkaraniwang pagkakamali ng lahat. Nakita nila ang maling paggamit o ang panghuhuwad sa kapangyarihan ng Espiritu Santo, at sila'y takot sa anumang bagay na di-pangkaraniwan. Ganito ang suliranin ng iglesya sa Tesalonica. Sinabi sa kanila ni Pablo na subukin nila ang lahat ng espiritu kung yao'y mula sa Dios at sila'y huwag tatanggap ng anumang bulaang hula o panghuhuwad sa gawain ng Dios. Subali't hindi nila dapat iwaksi ang tunay, kasabay ng huwad.



1 Tesalonica 5:19-22. "Huwag ninyong patayin ang ningas ng Espiritu. Huwag ninyong hamakin ang mga panghuhula. Subukin ninyo ang lahat ng bagay, ingatan ninyo ang mabuti. Layuan ninyo ang bawa't anyo ng masama."

Ang pagiging puspos ng Espiritu Santo ay tulad ng pagkakaroon ng mga kawad ng koryente sa bahay. Hindi nilagyan ng kawad ang bahay upang manatili ka sa dilim at saka magsabing: “May koryente na kami!” Buksan mo ang ilaw! Gamitin mo ang lakas ng koryente! Nasa Aklat ng Mga Gawa ang alituntunin ng Dios ukol sa wastong paggamit ng kapangyarihan ng Espiritu Santo.

### Ito Ang Alituntunin Para Sa Iyo

Dahil sa kapangyarihan ng Espiritu Santo sa buhay ng mga unang Cristiano, naging malinis at mabuti ang



kanilang buhay sa gitna ng kabihasnang tigib ng krimen at katiwalian. Taglay ang panloob na galak at kapayapaan, sila’y nakaawit ng pagpupuri sa Dios bagama’t hinahampas at nakabilanggo alang-alang kay

Cristo. Puspos ng pag-ibig ng Dios, kanilang pinatawad at idinalangin yaong mga umusig at nagpahirap sa kanila. Ang kapangyarihan ay ginamit nila nang wasto!

Taglay nila ang isang makapangyarihang pahayag, na buong kapangyarihan nilang ipinangaral. Nagsalita sila na may paninindigan. Alam nila kung ano ang kanilang sinasabi. Sinumang hindi kinaroroonan ni Cristo ay napapahamak, nguni’t ililigtas ni Jesus ang sasampalataya sa Kanya. Sila’y nangusap na may karunungan, katuwiran, at kagitingang lampas sa sarili nilang kakayahan – ang kapangyarihan ng Dios na sumumbat sa mga nakikinig upang madama nila ang kanilang pagka-makasalanan.

Makapangyarihan ang kanilang pananampalataya. Alam nila na ang Dios ay kasama nila at gumagawa sa pamamagitan nila, gaya ng ipinangako Niya. Kaya’t sa pangalan ni Jesus, pinalakad nila ang mga lumpo. Sila’y nanalangin, at nangyari ang maraming mga bagay. Gumaling ang mga maysakit. Nangabuksan ang pinto ng mga piitan. Nanumbalik sa Dios ang napakaraming makasalanan.

Naging mga saksi ang mga unang Cristiano dahil sa kapangyarihang ito, gaya ng sinabi ni Jesus. Lumakas ang loob nila at naging marubdob ang hangarin nilang masabi sa kapwa ang tungkol kay Jesus. May tungkulin silang dapat ganapin. Katapangan, pag-ibig, pangitain, at lubos na pagkakatalaga kay Cristo ang nagtulak sa kanila upang magpalipat-lipat sa maraming lalawigan at bayan, upang ibigay ang mabuting balita ng kaligtasan sa bawa't matanda at bata, sa bawa't nilalang sa kanilang kapanahunan.

Ito ang alituntunin ng kapangyarihan ng Unang Iglesya. Ang kanilang kapangyarihan, kung gayon, ay ang kapangyarihan ng Espiritu Santo na Siyang pumuspos sa kanila at gumawa sa pamamagitan nila. Kusang umagos ang mabubuting gawa mula sa kanilang buhay na umapaw sa kapuspusan ng Espiritu. Masusing inilalahad ng Biblia ang kanilang karanasan sapagka't ito ang alituntuning dapat panundan ng mga Cristiano ngayon.

### Gawin Mo Ito

1. Nawili ka ba sa pagbabasa sa Aklat ng Mga Gawa? \_\_\_\_\_
2. Ilang ulit binabanggit ang Espiritu Santo sa bawa't kabanata ng Aklat ng Mga Gawa? (Narito ang bilang ng mga kabanata. Isulat kung ilang ulit binabanggit ang Espiritu Santo sa bawa't naturang kabanata):

- |          |          |           |
|----------|----------|-----------|
| 1. _____ | 5. _____ | 9. _____  |
| 2. _____ | 6. _____ | 10. _____ |
| 3. _____ | 7. _____ | 11. _____ |
| 4. _____ | 8. _____ | 12. _____ |

### ANG PANGAKONG KAPANGYARIHAN



Ipinangako ni Juan Bautista na si Jesus ay magbabautismo sa Espiritu Santo at apoy. Ito'y pangkaraniwang pangako para sa lahat ng nahikayat at binautismuhan niya sa tubig.



Mateo 3:11. *“Binabautismuhan ko kayo sa tubig sa pagsisisi: datapuwa’t ang dumarating sa hulihan ko... lalong makapangyarihan kaysa akin ... Siya ang sa inyo’y magbabautismo sa Espiritu Santo at apoy.”*

May malaking gawain si Jesus para sa mga Cristiano sa buong panahon. Alam Niyang hindi nila ito magagawa sa kanilang sariling kalakasan. Kaya’t pinapaghintay Niya ang Kanyang mga tagasunod hanggang sa kamtan nila ang kapangyarihang kaloob ng Espiritu Santo, saka sila magiging mga saksi. Ang utos at pangako ni Jesus ay para sa lahat ng Kanyang mga tagasunod.



Lucas 24:49. *“Ipadadala Ko sa inyo ang pangako ng Aking Ama, datapuwa’t magsipanatili kayo sa bayan, hanggang sa kayo’y masangkapan ng kapangyarihang galing sa itaas.*



Gawa 1:4, 5, 8. *“Hintayin ang pangako ng Ama... Sapagka’t tunay na si Juan ay nagbautismo sa tubig, datapuwa’t kayo’y babautismuhan sa Espiritu Santo na di na malalaunan pa... Tatanggapin ninyo ang kapangyarihan pagdating sa inyo ng Espiritu Santo: at kayo’y magiging mga saksi Ko sa Jerusalem, at sa buong Judea at Samaria, at hanggang sa kahulihuhang hangganan ng lupa.”*

### Gawin Mo Ito


**3. Basahin ang Gawa 1:1-14. Isaulo ang mga talatang 4, 5, at 8.**

## ANG PANGAKONG NATUPAD NANG PENTECOSTES

Ano ang ginawa ng mga tagasunod ni Jesus upang tanggapin ang pangakong Espiritu Santo? Sa loob ng 10 araw, 120 silang lahat na naghihintay – nananalangin, nananalig, at umaasang may magaganap. At nangyari nga! Nang araw ng Pentecostes, tinanggap nila ng karanasang pentecostal, o Bautismo sa Espiritu Santo.




Gawa 1:14. *“Ang lahat ng ito’y nagsisipanatiling matibay na nangagkakaisa sa pananalangin.”*



*Gawa 2:1-5, 7, 8, 11, 13. "At nang dumating nga ang araw ng Pentecostes, silang lahat ay nangagkakatiapon sa isang dako. At biglang dumating mula sa Langit ang isang ugong na gaya ng sa isang humahagibis na hanging malakas, at pinuno ang buong bahay na kanilang kinauupuan. At sa kanila'y may napakitang mga dilang kawangis ng apoy, na nagkakabaha-bahagi; at dumapo sa bawa't isa sa kanila. At silang lahat ay nangapuspos ng Espiritu Santo, at nangagpasimulang magsalita ng iba't ibang wika, ayon sa ipinagkakaloob ng Espiritu na kanilang salitain."*

May mga nagsisitahan nga sa Jerusalem na mga Judio, mga lalaking relihiyoso, na buhat sa bawa't bansa sa ilalim ng Langit. At silang lahat ay nangagtaka at nagsipanggilalas, na nangagsasabi, "Narito, hindi бага mga Galileong lahat ang mga nagsisipagsalita ng ito? At bakit nga naririnig ng bawa't isa sa atin,... nagsisipagsalita sila sa ating mga wika ng mga makapangyarihang gawa ng Dios!" Datapuwa't ang mga iba'y nanganglilibak na nangagsasabi, "Sila'y puno ng bagong alak."

Bago nangyari ito, takot sa pag-uyam si Pedro. Kay laki ng ipinagbago niya pagkatanggap niya ng kapangyarihan ng Espiritu Santo! Siya'y tumayo at nangaral. Ipinaliwanag niya na ang nagaganap ay katuparan ng pangako ng Dios. Ibinuhos na ng Dios ang Kanyang Espiritu.



*Gawa 2:14-17, 41. "Datapuwa't pagtindig ni Pedro na kasama ang labing-isa, ay itinaas ang kanyang tinig, at sa kanila'y nagsaysay, na sinasabing... "Ang mga ito'y hindi mga lasing, gaya ng inyong inaakala... Ito'y yaong sinalita na sa pamamagitan ng propeta Joel: 'At mangyayari sa mga huling araw, sabi ng Dios, na ibubuhos Ko ang Aking Espiritu sa lahat ng laman. At ang inyong mga anak na lalaki at babae ay manganghuhula."*

Yaon ngang nagsitanggap ng kanyang salita ay nangabautismuhan: at nangaparagdag sa kanila nang araw na yaon ang may tatlong libong kaluluwa.

Mula noon, ang Aklat ng Mga Gawa ay naging tala ng pagkilos ng Espiritu Santo sa pamamagitan ng mga Cristiano; Kanyang tinulungan silang sumaksi, magpalaganap ng ebanghelyo, at umakay ng mga kaluluwa papalapit kay Cristo.



### Gawin Mo Ito

4. Basahin ang Mga Gawa kabanata 2.

5. Hanapin ang mga sagot sa Gawa 2:2-4:

Ano ang narinig ng mga tao? \_\_\_\_\_

\_\_\_\_\_

Ano ang nakita nila? \_\_\_\_\_

\_\_\_\_\_

Ano ang bumaba sa kanila? \_\_\_\_\_

\_\_\_\_\_

Ano ang pumuspos sa kanila? \_\_\_\_\_

\_\_\_\_\_

Ano ang kanilang ginawa? \_\_\_\_\_

\_\_\_\_\_

Naunawaan ba sila ninuman? \_\_\_\_\_

\_\_\_\_\_

Ano ang kanilang sinasabi? \_\_\_\_\_

\_\_\_\_\_

\_\_\_\_\_

### ANG KARANIWANG KARANASAN MATAPOS MAHIKAYAT

Inaasahan ng mga apostol na ang lahat ng mananampalataya, matapos mahikayat ay mangapuspos ng Espiritu Santo. Nilinaw ito ni Pedro.



*Gawa 2:38, 39. "At sinabi sa kanila ni Pedro: Mangagsisi kayo, at mangagbautismo ang bawa't isa sa inyo sa pangalan ni Jesu-Cristo sa ikapagpapatawad ng inyong mga kasalanan; at tatanggapin ninyo ang kaloob ng*



*Espiritu Santo. Sapagka't sa inyo ang pangako, at sa inyong mga anak, at sa lahat ng nangasa malayo, maging ilan man ang tawagin ng Panginoon nating Dios sa Kanya."*

Kapag may bagong nahikayat na di tumanggap ng bautismo ng Espiritu Santo matapos silang mahikayat, idinadalangin agad sila upang sila'y tumanggap ng bautismo ng Espiritu.



*Gawa 8:14-17. "Nang mabalitaan nga ng mga apostol na nangasa Jerusalem na tinanggap ng Samaria ang Salita ng Dios, ay sinugo nila si Pedro at si Juan. Na nang sila'y makalusong, ay pinanalangin nila sila, upang kanilang tanggapin ang Espiritu Santo. Sapagka't ito'y hindi pa bumababa sa kaninuman sa kanila... nang magkagayo'y ipinatong sa kanila ang kanilang mga kamay, at kanilang tinanggap ang Espiritu Santo."*

Nang mahikayat si Saulo, sinugo ng Dios si Ananias upang siya'y idalangin.



*Gawa 9:17. "Ang Panginoon ay nagsugo sa akin upang tanggapin mo ang iyong paningin, at mapuspos ka ng Espiritu Santo."*

Narinig ni Cornelio at ng kanyang sambahayan ang ebanghelyo, naniwala sila, at naligtas nang tanggapin ang katotohanan. Bago natapos ng pangangaral si Pedro, napuspos sila ng Espiritu. Iba naman ang karanasan ng mga taga-Efeso. Gaya ng maraming Cristiano mabautismuhan sila sa Espiritu Santo!



*Gawa 19:2,6 "Tinanggap бага ninyo ang Espiritu Santo nang kayo'y magsisampalataya? At sinabi nila sa kanya, Hindi, hindi man lamang namin narinig na may ibinigay na Espiritu Santo. At nang maipatong na ni Pablo sa kanila ang kanyang mga kamay, ay bumaba sa kanila ang Espiritu Santo."*

Ayon sa alituntunin ng Unang Iglesya, makikita nating nais ng Dios na puspusin ng Kanyang Espiritu ang lahat ng mga anak Niya. Mayaman at dukha, mangmang at marunong, pinuno ng relihiyon at makasalanang bagong





naligtas — lahat ng tao sa lahat ng bansa ay makatatanggap nito. Ang wika ni Cornelio, isang kawal-Romano:



*Gawa 10:34, 47 “Tunay ngang natatalastas ko na hindi nagtatangi ang Dios ng mga tao. Mangyayari bagang... huwag mangabautismuhan itong mga nagsitanggap ng Espiritu Santo na gaya naman natin?”*

### Gawin Mo Ito

6. Sino ang nagsabi: “Walang itinatangi ang Dios?” \_\_\_\_\_
7. Noong panahon ng Bagong Tipan, ang bautismo ba sa Espiritu Santo’y para sa mga apostol lamang o sa lahat ng Cristiano? \_\_\_\_\_
8. Ano ang ginawa ng mga apostol para sa mga bagong nahikayat sa Samaria na hindi pa tumatanggap ng Espiritu Santo? \_\_\_\_\_

## MGA TANDA NG KAPANGYARIHAN NG ESPIRITU

### Pagsasalita Sa Mga Wika

Nang dumating ang Espiritu noong Pentecostes, Siya’y nagbigay ng ilang tanda ng Kanyang kapangyarihan. Nakarinig ang mga tao ng tunog ng malakas na hangin. Nakakita sila ng mga dilang apoy. At nagsalita sila sa



mga wikang hindi nila napag-aralan. Inuulit ang isang tanda — ang pagsasalita sa mga wika — tuwing mayroong tumatanggap sa bautismo sa Espiritu Santo, mababasa sa Aklat ng Mga Gawa. Sa ganitong paraan nalaman ni Pedro na nakatanggap na ng bautismo sa

Espiritu ang sambahayan ni Cornelio. Naulit ito sa Efeso. Paghambingin ang mga karanasan:



*Gawa 2:4 "At silang lahat ay nangapuspos ng Espiritu Santo, at nangagpasimulang magsalita ng iba't ibang wika, ayon sa ipinagkaloob ng Espiritu na kanilang salitain."*



*Gawa 10:44-47 "Samantalang nagsasalita pa si Pedro ng mga salitang ito, ay bumaba ang Espiritu Santo sa lahat ng nangakikinig ng salita. At silang lahat na nagsiparoong kasama ni Pedro, ay nangamangha, sapagka't ibinuhos din naman sa mga Gentil ang kaloob na Espiritu Santo. Sapagka't nangarinig nilang nangagsasalita ang mga ito ng mga wika, at nangagpupuri sa Dios. Nang magkagayo'y sumagot si Pedro, "Mangyayari bagang hadlangan ng sinuman ang tubig, upang huwag mangabautismuhan itong mga nagsitanggap ng Espiritu Santo na gaya naman natin?"*



*Gawa 19:6 "Nang maipatong na ni Pablo sa kanila ang kanyang mga kamay, ay bumaba sa kanila ang Espiritu Santo; at sila'y nagsipagsalita ng mga wika, at nagsipanghula."*

Ang pagsasalita sa mga wika, sa kapangyarihan ng Espiritu Santo, ay ang kahima-himalang tanda na pinili ng Dios upang ipakitang napuspos ng Espiritu ang isang tao. Tinukoy kapwa ni Jesus at ni Pablo ang pagsasalita ng mga wika bilang tanda o katunayan.



*Marcos 16:17 "At lalakip ang mga tandang ito sa magsisisampalataya:... mangagsasalita sila ng mga bagong wika."*



*1 Corinto 14:22 "Ang mga wika ay pinakatanda... sa mga hindi nagsisisampalataya."*

Ginagamit pa rin ng Espiritu Santo ang tandang ito ng Kanyang kapangyarihan kapag pinupuspos Niya ang mga tao ngayon. Makababasa ka ng dokumentadong ulat sa *With Signs Following*, ni Stanley H. Frodsham; *They Speak With Other Tongues*, ni John Sherill; *Catholic Pentecostals*, ni Kevin at Dorothy Ranaghan; at marami pang gayong aklat. Sa *The Silent Speak*, sinasabi ni C.M. Ward na pati mga binging hindi nakapagsasalita ay malinaw na nangusap nang mabautismuhan sila sa Espiritu Santo!

Karaniwan, ang sinasambit ay di-kilalang wika sa kaninumang nasa kapulungan. Gayunman, maraming ulit na nangusap ang Espiritu sa wikang hindi alam ng nagsasalita nguni't nauunawaan ng ilan sa nasa kapulungan, gaya ng nangyari noong Pentecostes.



### Ibang Mga Tanda Ng Kapangyarihan

Nabasa mo ang maraming iba pang tanda ng kapangyarihan na kasunod ng pagkapuspos ng Espiritu: malinis na buhay, pag-ibig ng Dios, katapangan, at lubos na pagkakatalaga kay Cristo. Mga tanda ng kapangyarihan ang pagkakaroon ng matibay na pananampalataya, maapoy na panalangin, mabisang pagsaksi, at mabisang pangangaral. Ang mga bunga – pagkahikayat, paggaling, pagkabautismo sa Espiritu, at paglago ng iglesya – ay mga tanda pa rin ng kapangyarihan.

Isinulat ni Dr. Alexander MacLaren:

Wala nang hihigit pa sa lakas upang maipalaganap ang Kaharian ni Cristo at ang sumasaksing gawain ng Kanyang Iglesya, kaysa pagkakaroon ng Banal na Espiritung ito. Kapag nailubog ang isang tao sa maapoy na bautismong ito, lahat ng karamutan at kasamaang hadlang sa buhay ng marami sa atin ay natutupok at napapawi, at lumalaya tayo para maglingkod, sapagka't tinupok sa mahabaging pugon ng maapoy na kapangyarihan ng Dios ang taling gumagapos sa atin.

“Palalakasin kang mabuti ng Kanyang Espiritu sa pagkataong loob” – kapangyarihang pupuspos at aapaw sa buong katauhan mo, kung pahihintulutan mo, at magpapalakas sa iyo laban sa lahat ng uri ng pagtitiis, pakikibaka, paglilingkod, at pagsaksi para sa iyong Panginoon.

## NAIS MO BANG MAPUSPOS

Ang naghahanap sa Dios ay *dapat makatiyak na talagang nangyayari ang karanasan ng pagkapuspos ng Espiritu Santo*. Malibang ito'y paniwalaan niya, hindi siya mapupuspos; sapagka't ang pagkapuspos ay bahagi ng kabuuang panukala ng Dios sa pagtubos sa atin. Walang idinaragdag o labis, walang kataka-taka o kakaiba, kundi ito'y maayos at banal na kilusan ng Dios, batay at nag-uusbong sa gawain ni Cristo, ang pagpapakasakit para sa ating kaligtasan. Dapat niyang paniwalaang tumpak at maayos ang lahat ng ito. Kung hindi, aking iminumungkahi na maglaan siya ng panahon upang mag-ayuno, manalangin at magbulay sa Salita ng Dios. Ang pananampalataya ay buhat sa Salita ng Dios.

Matapos mahikayat ang isang tao na maaari siyang mapuspos ng Espiritu Santo *dapat niyang nasain ang magkagayon*. Ganito ang tanong sa nagmamalasakit na makabatid ng katotohanan: Natitiyak mo bang nais mong ikaw'y angkinin ng Isang Espiritu na bagama't Siya'y malinis at maamo at marunong at mapagmahal, ay nagpipilit namang maging Panginoon ng buong buhay mo? Natitiyak mo bang nais mo na ang iyong buong katauhan ay pangibabawan ng Isang hihiling ng iyong pagsunod sa nasusulat na Salita? Ng Isang hindi magpapaubayang manatili sa iyong buhay ang anumang kasalanan, pag-ibig sa sarili, o pagmamalabis? Ng Isang hindi magpapahintulot sa iyong magmamalaki, magpalalo, o magmarangya? Ibig mo bang Siya, hindi na ikaw, ang maghahari sa iyong buhay, at karapatan Niyang subukin ka at disiplinahin? Na aalisin Niya ang maraming bagay na gustong-gusto mo nguni't lihim namang nakasisira sa iyong kaluluwa?

Malibang ika'y sang-ayon sa lahat ng ito, hindi mo nais na talagang mapuspos. Maaaring nais mo lamang ang kasiyahan o ang tagumpay o ang kapangyarihan, subali't hindi ang tunay na pagkapuspos ng Espiritu Santo.

-Hinalaw sa "Keys to the Deeper Life,"  
Ni W.A. Tozer, ng Christian and Missionary Alliance.  
©1957 ng Sunday Magazine, Inc.,  
Zondervan Publishing House, Grand Rapids,  
Michigan. Ginamit ng may pahintulot.